

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗門布，摺正對甜甜夢肚醒來个僵攢手；難得个放棄日，懶在眠床看日頭輕輕徒步、聽窗門外鳥聲吱啁，時間也像恬恬頓腳咧，啊！這靚靚个朝晨。

食飽朝，想去尋久無見面个朋友遠寮。自家駛車，時間扼在自家个手頭町，做得慢慢仔行、定定仔寮；經過鬧熱个街路，車輪仔轉落鄉道，來到苗栗个穀倉——灣裡。路兩片金黃飽米个禾串強強會對田肚渟出來；風吹來，一陣一陣歡喜到手攘腳踏、搖頭扭腰个金黃稻浪，分人心情暢快。田脣企等兩個在該比手畫腳个阿伯，日頭晟來，笠嫫下晒到烏刻刻个面町，單淨看著兩排雪白个牙齒，想來應該當滿意今年係好年冬咧！

幹過一隻大彎幹，共樣係闊野野个田地，直直透到山下；深深淺淺个黃襯等青青个田、綠綠个大樹，像係天公伯个調色盤，也係這隻豐收季節正有个景色。該向有幾夫既經割忒早冬禾，準備愛過蒔二冬禾个田，田水鮮鮮，將朗朗个藍天摺白雲、田脣个樹仔摺人家个屋，清清楚楚反映出來，斯像框在用田塍做相框裡

肚个相片，實在還靚。這向堵好有一夫田當在該割禾，紅色个割禾機在田肚緊行緊割，三、四個人在脣頭搨手，無閒直掣；割禾機背後跔歸陣白鶴，有兜低頭絡食、有兜大步行尋食、有兜飛高飛低搶食，鬧熱煎煎，這斯係田肚最有生命力个畫面咧！

車仔慢慢仔溜落莊頭，伏在路脣个老狗牯看著車仔來，伸懶筋企起來拂尾，像迎接老朋友樣。一個著花衫个伯姆站在屋面前个菜園摘菜，菜園分屋蔭等、日頭旨有晒著，青里里个菜葉面還有露水，看起來當萋、當錫人食。兩個國小年紀个細阿哥仔，一儕慢慢仔箭自行車、一儕半行半走、手町還拗等籃球，嘻嘻哈哈有講有笑愛共下去打球仔。這一路个光景，實在分人心情鬆爽。

主人準備好一桌點心、地豆摺瓜子，還有清香个高山烏龍茶，三、四個當久無見面个老朋友，天南地北講到毋知天合地。茶香、情醺，靚靚个日仔、靚靚个心情，這斯係簡單个幸福。

編號 2 號

【陂塘】許倩雯原作

用鏡頭記錄臺灣這遍土地个導演齊柏林，坐在直升機頂對天頂看往下，形容桃園个陂塘就像係「散落一地泥个水晶，金若若仔¹！」

兩隻白鶴一前一後在陂塘面頂飛過，白雪雪个身影倒映在平靜个水面。水蓮花²對青青个水肚探出頭，細細蕊个黃花就像天頂緊瞞緊瞞个星仔，靚到耐毋得。

立秋正過啊忒，陂塘就飛來一群準備愛過冬个人客！鬥腳鳥³水紅色个長腳，踩在淺水个位所定仔行，鳥觜在水竇肚掃來掃去，無閒在該尋食。花刺花刺个細水鴨撈頭那汨落水肚，屎肫翹到半天高。忽然間，一粒扁扁个石頭飛啊過來，嚇到這群鳥仔被翼飛起。原來係陂塘脣，走來一群細姪仔在該打水漂仔。坐在樹下擎等釣槓个男仔人，大聲罵：「有人在這釣魚仔，你兜孤盲頭在該變麼个齣事，毋好來這搞！」

月光蹶上天頂，在水撈地个合界，白鶴花⁴个清香跔等夜風散開來。夜呱仔⁵醒咧，昏哆昏哆仔⁶喊幾聲「嘎！嘎！嘎！」像烏鈕仔恁大个甥甥仔扭等尾泗水，臙身既經生出四支腳咧，在陂塘角尋位所上岸。蛇哥發現在水肚跳出來个鳥影，黏時對草竇趁啊出來，開始追佢兜！

有人撈桃園喊做「千陂之鄉」，這肚底像碗公樣，大大細細个陂塘，全部係人工挖出來个。先民在開墾个過程肚盡艱苦，高不將挖陂塘來頓水蔭田。陂塘最多个時節，有萬過隻，也變成桃園當特殊个地理景色。每一隻陂塘都有自家个故事，當多人第一擺泗水、第一擺釣魚仔，都係在陂塘肚發生。

年堵年，跔等時代个流轉，桃園都市化个程度緊來緊高。有兜陂塘失忒蔭水个功能，一隻一隻分人屯忒，起做機場、學校，抑係公園咧。伸下來个陂塘，經過整頓，嘎有了新生命个延續，變成現代人休閒遶寮个好所在！

¹ 金若若仔：音 gim` na` na` er；金光閃閃。

² 水蓮花：音 shui` lien fa`；臺灣萍蓬草。

³ 鬥腳鳥：音 deu` giog diau`；高蹺鴿。

⁴ 白鶴花：音 pag` hog` fa`；野薑花。

⁵ 夜呱仔：音 rha` gua er；夜鷺。

⁶ 昏哆昏哆仔：音 fun de fun de er；頭暈腦脹的。

編號 3 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該時堵好係梅雨季節，落過水、起風咧，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩虹，還鼻得著馬膠路¹分日頭煎過、分雨水打過以後淡淡、香香个味道，臨暗頭窗門外背一陣一陣「撚撚撚——撚撚撚——」个蟬仔聲跔等清風傳落屋肚來。

佢想起還細時節，熱爌爌个下晝頭，佢這兜姊妹會摻隔壁鄰舍个細人仔伴共下搞，長下搞到斷烏，聽著阿姆開聲喊：「好轉來洗手食飯咧！」正盼得轉屋。

佢爸係客運司機，平常時愛輪班，所以總係暗晡頭八、九點正下班。當記得係堵好該日無伸麼个飯菜，佢爸會自家煮麵食。逐擺佢就先摻蒜頭礮礮仔剝到幼幼、滷一息豆油還過香油在碗公肚，續等摻煮好个麵撈起來，水必燥倒在碗公肚，摻蒜頭、配頭共下攪分佢勻，該兩時係聽著佢爸問：「有麼人愛食麵無？」佢這兜就當暢，遽遽飄落灶下，你一口、佢一口，又賺著一餐香噴

噴个宵夜，食到飽飽仔，還幸福哪！佢爸摻个飯菜間等伸無幾多條个麵，儘採划落肚，就恁樣過一餐。

又還記得，熱天臨暗仔洗好身腳，等到食飽夜檢掙好、寫好作業、看一下電視，細人仔還細又好搞，差毋多到愛上眠床該下，又一身汗咧。頭擺屋下無恁好額，斯有一隻間房安有冷氣定定。阿姆會在睡目前半點鐘摻冷氣擰開來，等到大家愛睡該下，間房門打啊開來，斯有涼沁沁个冷氣吹來，歸屋人一下仔就睡落覺咧。

這幸福个滋味一直因在佢个心肝肚，毋多知仔成人長大、做人阿姆以後，正知「賺錢可比針挑筊，使錢可比水推沙。」乜正體會爺哀頭擺辛苦畜大佢這兜細人仔，還過愛理一隻家哪有恁該？毋過該愛盡个責任摻義務，佢兜從來都毋識放忒過。

¹ 馬膠路：音 ma ga lu⁺；柏油路。